



GIUSEPPE CABIZZOSU

BIBLIOTECA

www.giuseppcabizzosu.it

Pietro Bezzu

(Padria 17?? - 1869)

Poesie scelte in lingua sarda



GIUSEPPE CABIZZOSU
BIBLIOTECA
www.giuseppecabizzosu.it

Pietro Bezzu

(Padria 17?? - 1869)

Poesie scelte
in lingua sarda



GIUSEPPE CABIZZOSU
BIBLIOTECA
www.giuseppecabizzosu.it

Pietro Bezzu

(Padria 17?? - 1869)

Di Padria.

Poeta ed improvvisatore di buona fama. Morì nel 1869.

Fra Costanziu Carvone

Fra Costanziu Carvone!
già tenet bonu su trattu,
una promissa m'hat fattu
dae s'annu sessant'unu,
asi cumprat cun d'ogniunu
cantu hat cun megus cumpridu:
tres annos si che hat finidu
senza bider sa promissa.
Non creo mancu in sa missa
sa chi assistit in s'altare
proite no hat a resare
cuddu *Confiteor Deo*,
dai cussu solu creo
ch'est de trampas garrigadu,
si non l'haere pagadu
podiat tenner rejone,
ma hat su nomen de Carvone
e de carvone hat su pesu,
o forsi l'hapo pretesu
a mi la dare a regalu?
S'est chi li naro ch'est malu
issu si nd'hat a offender
ca est licu de pretender
riguardos e honore.
Fit a fagher su favore
a m'attire solamente,
custa la tenzo presente
bell'e roba 'e pagu impitta;
cust'amore fritta fritta
chi sempre mustradu mi hada
bi l'hapo rifiutada
ca fit lena e paga ispèra,
e da una tabachera
bessire già nde podimus,
solamente distinghimus
totu s'amore, e sos padres
issos nos mirant che frades
cando pedint sas intragnas
ispozende sas campagnas,
sas arzolas e cuiles,
e si vivent de ziviles
cun s'astuzia e arte insoro
non mustrant cuddu decoro
de Santu Franciscu 'e Assi',
pro figura benesi
giughent s'abidu e cordone
pro inzegare su mundu.

Faeddemus dae fundu
totta sa conseguenza:
e ue est sa penitenzia
sa ch'in cunventu faghides?
Bois iscarpas giughides
lustradas de marrochinu,
ma Franziscu Serafinu
andait cun su pè nudu;
est vividu e mortu arvudu
e bois tottu arvi fattos;
cando chimbe e ses piattos
b'hazis in su refettoriu
cale afflittu purgatoriu
sunu sas bostras lamentas
dende a su populu affrentas
chi paga cosa bos dana.
Sa famiglia franziscana
sezis persones astutas,
finzas s'abitu a iscuttas
in dossu ostru giughides,
Santu Franziscu a ischides
chi mai si lu hat bogadu?
Finza in su lettu corcadu
si lu giughiat bestidu.
Su chi su santu hat patidu
bois lu gosades como,
sos furros de ogni domo
donzi die visitades,
sas feminas imbovades
sabia siat o macca,
tribagliades cun sa sacca
ca est su ostru istrumentu;
o su tempus de s'avventu
lu passades penitente?
Si mi fit cumbeniente
cantu bos cheria narre'!
S'abidu ostru a sa carre
non bi podet giomper mai
ca bei hat pizos assai
de crambich e de flanella,
e da ch'andades a zella
subitu bos lu leades,
in su muru l'appicades
che roba 'e pagu valore,
e dogni benefattore
est cun bois generosos.
Poi sezis rezelosos
de s'istadu cappuzzinu,
lis serrades su caminu
chi dogni cosa lis neghent,
a bois solu chi aggreghent

custu consizu già dades
ca nachi ois cunservades
su cunventu 'e Terra Santa
de ch'est unica pianta
de nostra redenzione.
Deo bos dao rejone
chi custu lu cunservedes,
a Cappuzzinos non lêdes
su bene chi si meritant
ca penitentes impitant
sas oras de mesa notte,
su legu, su sazerdote
si faghent sa matutina;
sa familia cappuzzina
imitat giustu su santu;
tuniga, abidu e mantu
giughent solu in sa persone,
issos non giughent bentone
ne pantalones de pannu,
sunt iscurzos tottu s'annu
a biddia e a serenu,
una buada de fenu
tenent pro si riposare,
pro si poder ammantare
unu pizu de fressada,
cun s'arva mai rasada
chi giughent cussas persones
veras decorassiones
de su santu fundadore.
Non vivet mancu segnore
che i su padre osservante,
poi raru est su chircante
chi non prestat cantidades,
finza su santu ingannades
senza sos superiores,
a dogni giuarzu minore
hazis fattu de asie,
gosi custu hat fattu a mie
ch'est una cosa de ispantu;
pro riguardu a su santu
nd'evito s'occasione,
fra Costanziu Carvone,
fra Costanziu Carvone!